

TITULUS VII.

DE BENEDICTIONIBUS ECCLESIE, ORATORII, ET CEMETERII, DE IPSORUM RECONCILIATIONE, ET DE BENEDICTIONE SIGNI VEL CAMPANÆ.

Benedictiones in hoc septimo titulo contentæ non possunt fieri nisi à Sacerdote facultatem habente ab Episcopo.

BENEDICTIO, SEU RITUS BENEDICENDI, ET IMPONENDI PRIMARIUM LAPIDEM PRO ECCLESIA AEDIFICANDA, SERVANDUS Á SACERDOTE FACULTATEM HABENTE AB EPISCOPO.

(Ex Rit. Rom.).

Ecclesiam ex Episcopi auctoritate tantum, juxta sacrorum Canonum decreta ædificari fas est. Si vero Sacerdos ejus ædificationis primarium lapidem benedicendi potestatem habens, ejusmodi functionem peragat, hunc ritum servabit.

Pridie quam primarius lapis benedicatur, ligneam Crucem in loco, ubi debet esse Altare, figat ipse, vel alius Sacerdos. Sequenti vero die lapis in Ecclesiae fundatione ponendus, qui debet esse quadratus, et angularis, benedicatur hoc modo.

Sacerdos indutus amictu, alba, cingulo, stola, et pluviali albi coloris, adhibitis aliquot Sacerdotibus et Clericis, salem et aquam benedit, nisi prius in promptu habeat jam benedictam ordinaria benedictione, ut supra

pag. 21, et interim, dum cantatur à Clericis Antiphona cum Psalmo sequenti, aspergit locum, ubi Crux posita est, cum aqua benedicta.

Antiph. Signum salutis pone, Domine Jesu-Christe, in loco isto : et non permittas introire angelum persecutientem.

PSALMUS LXXXIII.

Quam dilecta tabernacula tua, Domine virtutum : * concupiscit, et deficit anima mea in atria Domini. Cor meum, et caro mea, * exultaverunt in Deum vivum.

Etenim passer invenit sibi domum : * et turtur nidum sibi, ubi ponat pullos suos.

Altaria tua, Domine virtutum : * Rex meus, et Deus meus.

Beati, qui habitant in domo tua, Domine : * in sæcula sæculorum laudabunt te.

Beatus vir, cuius est auxilium abs te : * ascensiones in corde suo disposuit, in valle lacrymarum, in loco quem posuit.

Etenim benedictionem dabit legislator, ibunt de virtute in virtutem : * videbitur Deus deorum in Sion. Domine, Deus virtutum exaudi orationem meam : * auribus percipe, Deus Jacob.

Protector noster aspice, Deus ; * et respice in faciem Christi tui.

Quia melior est dies una in atriiis tuis, * super millia. Elegi abjectus esse in domo Dei mei, * magis quam habitare in tabernaculis peccatorum.

Quia misericordiam , et veritatem diligit Deus : * gratiam et gloriam dabit Dominus.

Non privabit bonis eos , qui ambulant in innocentia : * Domine virtutum , beatus homo qui sperat in te.

Gloria Patri , et Filio , et Spiritui Sancto , etc.

Antiph. Signum salutis pone , Domine Jesu-Chris-
te , in loco isto : et non permittas introire angelum
percutientem.

*Finito Psalmo , Sacerdos versus ad locum per eum
aspersum dicit :*

OREMUS.

Domine Deus , qui licet cœlo et terra non capiaris , domum tuam dignaris habere in terris , ubi nomen tuum jugiter invocetur : locum hunc , quæsumus , Beatae Mariae semper Virginis , et beati N. (nominando *Sanctum vel Sanctam* , in cuius honorem ac nomen fundabitur Ecclesia) , omniumque Sanctorum intercedentibus meritis , sereno pietatis tuæ intuitu visita , et per infusionem gratiæ tuæ , ab omni inquinamento purifica , purificatumque conserva ; et qui dilecti tui David devotionem in filii sui Salomonis opere complevisti , in hoc opere desideria nostra perficere digneris , effugiantque omnes hinc nequitiae spirituales . Per Dominum nostrum Jesum-Christum Filium tuum , etc.

Postea stans benedit primarium lapidem , dicens :

¶. Adjutorium nostrum in nomine Domini .

¶. Qui fecit cœlum et terram .

¶. Sit nomen Domini benedictum .

¶. Ex hoc nunc et usque in sæculum .

¶. Lapidem quem reprobaverunt ædificantes .

¶. Hic factus est in caput anguli .

¶. Tu es Petrus .

¶. Et super hanc petram ædificabo Ecclesiam meam .

¶. Gloria Patri , et Filio , et Spiritui Sancto .

¶. Sicut erat in principio , et nunc , et semper , et in sæcula sæculorum . Amen .

OREMUS .

Domine Jesu-Chrste Fili Dei vivi , qui es verus omnipotens Deus , splendor , et imago æterni Patris , et vita æterna : qui es lapis angularis de monte sine manibus abscissus , et immutabile fundamentum : hunc lapidem collocandum in tuo nomine confirma ; et tu , qui es principium , et finis , in quo principio Deus Pater ab initio cuncta creavit , sis , quæsumus , principium , et incrementum , et consummatio ipsius operis , quod debet ad laudem et gloriam tui nominis inchoari . Qui cum Patre et Spiritu Sancto vivis , et regnas Deus per omnia sæcula sæculorum . ¶. Amen .

Tunc aspergit lapidem ipsum aqua benedicta , et accepto cultro , per singulas partes sculptit in eum signum Crucis , dicens :

In nomine Pa†ris , et Fi†lii , et Spiritus † Sancti . ¶. Amen .

Quo facto dicit :

OREMUS .

Bene † dic , Domine , creaturam istam lapidis , et

præsta per invocationem sancti tui Nominis : ut qui-cumque ad hanc Ecclesiam ædificandam pura mente au-xilium dederint, corporis sanitatem, et animæ medelam percipient. Per Christum Dominum nostrum. **n.** Amen.

Postea dicantur Litaniæ ordinariæ sine Orationibus in fine positis, ut supra pag. 40 : quibus dictis, parato cæmento, et cæmentario assistente, Sacerdos inchoat, Clericis prosequentibus, Antiphonam.

Antiph. Mane surgens Jacob, erigebat lapidem in titulum : fundens oleum desuper, votum vovit Domino : Vere locus iste sanctus est, et ego nesciebam.

PSALMUS CXXVI.

Nisi Dominus ædificaverit domum : * in vanum labo-raverunt qui ædificant eam.

Nisi Dominus custodierit civitatem : * frustra vigilat qui custodit eam.

Vanum est vobis ante lucem surgere : * surgite post-quam sederitis, qui manducatis panem doloris.

Cum dederit dilectis suis somnum : * ecce hæreditas Domini, filii ; merces fructus ventris.

Sicut sagittæ in manu potentis : * ita filii excussorum.

Beatus vir, qui implevit desiderium suum ex ipsis : * non confundetur, cum loquetur inimicis suis in porta.

Gloria Patri, et Filio, et Spiritui Sancto, etc.

Quo dicto, Sacerdos stans tangit, et ponit ipsum primarium lapidem in fundamento dicens :

In fide Jesu-Christi collocamus Lapidem istum pri-marium in hoc fundamento, in nomine Pa~~tris~~ tris, et

Fi~~lii~~ et Spiritus~~lii~~ Sancti, ut vigeat vera fides hic, et timor Dei, fraternaque dilectio ; et sit hic locus des-tinatus orationi, et ad invocandum, et laudandum no-men ejusdem Domini nostri Jesu-Christi, qui cum Pa-tre et Spiritu Sancto vivit et regnat Deus per omnia saecula saeculorum. **n.** Amen.

Interim cæmentarius locat ipsum lapidem cum cæ-mento : postea Sacerdos spargit super ipsum lapidem aquam benedictam, dicens :

Asperges me, Domine, hyssopo, et mundabor : la-vabis me, et super nivem dealbabor.

PSALMUS. L.

Miserere mei Deus, * secundum magnam misericor-diam tuam.

Et secundum multitudinem miserationum tuarum : * dele iniquitatem meam.

Amplius lava me ab iniquitate mea, * et à peccato meo munda me.

Quoniam iniquitatem meam ego cognosco : * et pecca-tum meum contra me est semper.

Tibi soli peccavi, et malum coram te feci : * ut justi-ficeris in sermonibus tuis, et vincas, cum judicaris.

Ecce enim in iniquitatibus conceptus sum, * et in pec-catis concepit me mater mea.

Ecce enim veritatem dilexisti : * incerta, et occulta sapientiae tuae manifestasti mihi.

Asperges me hyssopo et mundabor : * lavabis me et super nivem dealbabor.

Auditui meo dabis gaudium et lætitiam, * et exulta-
 bunt ossa humiliata.
 Averte faciem tuam à peccatis meis, * et omnes ini-
 quitates meas dele.
 Cor mundum crea in me, Deus : * et spiritum rectum
 innova in visceribus meis.
 Ne projicias me à facie tua : * et spiritum sanctum
 tuum ne auferas à me.
 Redde mihi lætitiam salutaris tui : * et spiritu princi-
 pali confirma me.
 Docebo iniquos vias tuas, * et impii ad te convertentur.
 Libera me de sanguinibus, Deus, Deus salutis meæ : *
 et exultabit lingua mea justitiam tuam.
 Domine, labia mea aperies : * et os meum annuntiabit
 laudem tuam.
 Quoniam si voluisses sacrificium, dedissem utique : *
 holocaustis non delectaberis.
 Sacrificium Deo spiritus contribulatus : * cor contri-
 tum et humiliatum, Deus, non despicies.
 Benigne fac, Domine, in bona voluntate tua, Sion : *
 ut ædificantur muri Jerusalem.
 Tunc acceptabis sacrificium justitiae, oblationes, et ho-
 locausta : * tunc imponent super altare tuum vi-
 tulos.
 Gloria Patri, et Filio, et Spiritui Sancto, etc.
Quo dicto, Sacerdos spargit aquam benedictam per omnia fundamenta, si sunt aperta : si vero non sunt aperta, circuit aspergendo fundamenta Ecclesiae designata. Et incipiens aspergere, inchoat Antiphonam, Cle-ro prosequente.

Antiph. O quam metuendus est locus iste! Vere non
 est hic aliud, nisi domus Dei, et porta cœli.

PSALMUS LXXXVI.

Fundamenta ejus in montibus sanctis : * diligit Domi-
 nus portas Sion super omnia tabernacula Jacob.
 Gloriosa dicta sunt de te, * civitas Dei.
 Memor ero Rahab et Babylonis, * scientium me.
 Ecce alienigenæ, et Tyrus, et populus Æthiopum, *
 hi fuerunt illic.
 Numquid Sion dicet: Homo, et homo natus est in ea : *
 et ipse fundavit eam Altissimus?
 Dominus narrabit in scripturis populorum, et princi-
 pum ; * horum, qui fuerunt in ea.
 Sicut lætantum omnium * habitatio est in te.
 Gloria Patri, et Filio, et Spiritui Sancto, etc.

Antiph. O quam metuendus est locus iste! Vere
 non est hic aliud, nisi domus Dei, et porta cœli.

*Interim aspergendo procedit usque ad fundamenta
 aperta, seu designata, et repetita Antiphona, stans di-
 cit : Oremus.*

Ministri. Flectamus genua. *R.* Levate.

Omnipotens, et misericors Deus, qui Sacerdotibus
 tuis tantam præ ceteris gratiam contulisti, ut quidquid
 in tuo nomine, digne, perfecteque ab eis agitur, à te
 fieri credatur : quæsumus immensam clementiam tuam,
 ut quidquid modo visitaturi sumus, visites : et quid-
 quid benedicturi sumus, bene ✠ dicas : sitque ad nos-
 træ humilitatis introitum, Sanctorum tuorum meritis,

fuga dæmonum, Angeli pacis ingressus. Per Christum Dominum nostrum. **R.** Amen.

Deus, qui ex omnium cohabitatione Sanctorum aeternum Majestati tuæ condis habitaculum: da ædificationi tuæ incrementa cœlestia: ut quod te jubente fundatur, te largiente perficiatur. Per Christum Dominum nostrum. **R.** Amen.

BENEDICTIO SEU RITUS BENEDICENDI NOVAM ECCLESIAM, SEU ORATORIUM PUBLICUM, UT IBI SS. MISSÆ SACRIFICIUM CELEBRARI POSSIT.

(Ex Rit. Rom.).

Oratoria privata non benedicuntur hac benedictione; sed solum benedictione loci, ut supra, pag. 58: quia non sunt perpetuo destinata ad res sacras, et possunt juxta voluntatem domini ad res non sacras seu profanas assignari.

Sacerdos novam Ecclesiam de licentia Episcopi benediturus, ut in ea divinum Sacrificium Missæ rite celebretur stola ac pluviali albi coloris indutus aliquot Sacerdotibus et Clericis adhibitis, prælata Cruce media inter duos Clericos deferentes cereos accensos, mane procedit ad primariam Ecclesiae, vel Oratoriū januam: ubi stans capite aperto, conversus ad eam dicit absolute orationem:

Actiones nostras, quæsumus Domine, aspirando præveni, et adjuvando prosequere: ut cuncta nostra oratio et operatio à te semper incipiat, et per te cœpta finiatur. Per Christum Dominum nostrum. **R.** Amen.

Deinde inchoat Antiphonam: Asperges me, etc., et

Clerus alternatim dicit Psalmum, Miserere, etc., ut supra pag. 221, in fine Gloria Patri.

Interim circumdant exterius Ecclesiam (quæ intus debet esse vacua et nuda, et pariter Altaria nuda, excluso populo, donec absoluta sit benedictio), et Sacerdos accepto aspergillo ex herba hyssopi, ad ejus dexteram se convertens, parietes Ecclesiae in superiori parte, et in fundamentis, cum aqua benedicta aspergit, dicens:

Asperges me, Domine, hyssopo, et mundabor: lavabis me, et super nivem dealbabor.

Reversi ad locum, unde Processio initium habuit, repetita Antiphona à Clero, Sacerdos stans ut prius versus Ecclesiam, dicit: Oremus.

Ministri: Flectamus genua. **R.** Levate.

Oratio.

Domine Deus, qui licet cœlo et terra non capiaris, domum tamen dignaris habere in terris, ubi nomen tuum jugiter invocetur: locum hunc, quæsumus, Beatae Mariæ semper Virginis, et Beati N., omniumque Sanctorum intercedentibus meritis, sereno pietatis tuæ intuitu visita, et per infusionem gratiæ tuæ ab omni inquinamento purifica, purificatumque conserva; et qui dilecti tui David devotionem in filii sui Salomonis opere complevisti, in hoc opere desideria nostra perficere digneris, effugiantque omnes hinc nequitæ spirituales. Per Dominum nostrum Jesum-Christum Filium tuum: qui tecum vivit et regnat in unitate Spiritus Sancti Deus, per omnia sæcula sæculorum. **R.** Amen.

Qua finita Oratione, omnes bini in Ecclesiam intran-

tes, ad Altare majus procedunt, Litanias decantantes ut supra pag. 40.

Ubi dictum fuerit: Ut omnibus fidelibus defunctis requiem aeternam donare digneris. Te rogamus, audi nos, surgit Sacerdos, et intelligibili voce dicit: Ut hanc Ecclesiam, et Altare ad honorem tuum, et nomen Sancti tui N., purgare; et bene ✠ dicere digneris. Te rogamus, audi nos.

Cum dicit, benedicere, manu dextera benedit Ecclesiam, et Altare: deinde, ut prius, genuflexit donec perficiantur Litaniae, et Cantores prosequuntur:

Ut nos exaudire digneris, te rogamus, audi nos.

Fili Dei, te rogamus, audi nos.

Agnus Dei, qui tollis, etc.

Dicto ultimo, Kyrie eleison, Sacerdos stans, dicit: Oremus.

Ministri. Flectamus genua. n. Levate.

Præveniat nos, quæsumus Domine, misericordia tua: et intercedentibus omnibus Sanctis tuis, voces nostras clementia tuæ propitiationis anticipet. Per Christum Dominum nostrum. n. Amen.

Tum distans ab Altari congruenti spatio genuflexus, et se signans, dicit: Deus in adjutorium meum intende, et statim surgit, Clero respondente: Domine, ad adjuvandum me festina: ipse vero stans dicit, Gloria Patri, et Filio, et Spiritui Sancto. Chorus respondet, Sicut erat in principio, et nunc, et semper, et in saecula saeculorum. Amen.

Postea Sacerdos dicit: Oremus.

Ministri. Flectamus genua. n. Levate.

Oratio.

Omnipotens, et misericors Deus, qui Sacerdotibus tuis tantam præ ceteris gratiam contulisti, ut quidquid in tuo nomine digne, perfecteque ab eis agitur, à te fieri credatur: quæsumus immensam clementiam tuam, ut quidquid modo visitaturi sumus, visites; et quidquid benedicturi sumus, bene ✠ dicas: siisque ad nostræ humilitatis introitum, Sanctorum tuorum meritis, fuga dæmonum, Angeli pacis ingressus. Per Dominum, etc.

His dictis, inchoat Antiphonam, Benedic, Domine, domum istam nomini tuo ædificatam, cum tribus Psalmis sequentibus, videlicet:

PSALMUS CXIX.

*Ad Dominum, cum tribularer, clamavi: * et exaudiuit me.*

*Domine, libera animam meam à labiis iniquis: * et à lingua dolosa.*

*Quid detur tibi, aut quid apponatur tibi, * ad linguam dolosam?*

*Sagittæ potentis acutæ, * cum carbonibus desolatoriis. Heu mihi, quia incolatus meus prolongatus est! Habitavi cum habitantibus Cedar: * multum incola fuit anima mea.*

*Cum his, qui oderunt pacem, eram pacificus: * cum loquebar illis impugnabant me gratis.*

Gloria Patri, et Filio, et Spiritui Sancto, etc.

PSALMUS CXX.

Levavi oculos meos in montes, * unde veniet auxilium mihi.
 Auxilium meum à Domino, * qui fecit cœlum, et terram.
 Non det in commotionem pedem tuum: * neque dormitet, qui custodit te.
 Ecce non dormitabit neque dormiet, * qui custodit Israël.
 Dominus custodit te, Dominus protectio tua, * super manum dexteram tuam.
 Per diem sol non uret te; * neque luna per noctem.
 Dominus custodit te ab omni malo: * custodiat animam tuam Dominus.
 Dominus custodiat introitum tuum, et exitum tuum: * ex hoc nunc et usque in sæculum.
 Gloria Patri, et Filio, et Spiritui Sancto, etc.

PSALMUS CXXI.

Lætatus sum in his, quæ dicta sunt mihi: * in domum Domini ibimus.
 Stantes erant pedes nostri, * in atriis tuis, Jerusalem.
 Jerusalem, quæ ædificatur ut civitas: * cuius participatio ejus in idipsum.
 Illuc enim ascenderunt tribus, tribus Domini: * testimonium Israel ad confitendum nomini Domini.
 Quia illic sederunt sedes in **judicio**: * sedes super dominum David.

Rogate, quæ ad pacem sunt Jerusalem: * et abundantia diligentibus te.

Fiat pax in virtute tua: * et abundantia in turribus tuis.
 Propter fratres meos, et proximos meos, * loquebar pacem de te.

Propter domum Domini Dei nostri: * quæsivi bona tibi.
 Gloria Patri, et Filio, et Spiritui Sancto, etc.

Antiph. Benedic, Domine, domum istam nomini tuo ædificatam.

Interim aspergit interius parietes in parte superiori et inferiori, inchoans aspersionem à parte Evangelii, dicens: Asperges me, etc., tum ad Altare reversus, dicit: Oremus.

Ministri. Flectamus genua. *R.* Levate.

Deus, qui loca nomini tuo dicanda sanctificas, effunde super hanc orationis domum gratiam tuam: ut ab omnibus hic nomen tuum invocantibus auxilium tuæ misericordiae sentiatur. Per Dominum, etc.

R. Amen.

His peractis, dicitur Missa de tempore occurrenti, vel de Sancto.

Ecclesia vero, quamvis à simplici Sacerdote, ut supra, sit benedicta, ab Episcopo tamen consecranda est.